

摘藻堂四庫全書薈要

集部

欽定四庫全書薈要

集部

元詩選初集卷二十七

詳校官候選知縣臣吳甸華



欽定四庫全書薈要卷二萬三百八十七

集部

元詩選初集卷二十七

長洲

顧嗣立

編

楊載仲弘集

載字仲弘建之浦城人後徙家於杭博涉羣書年四十不仕戶部賈國英數薦於朝以布衣召爲翰

林國史院編修官與修武宗實錄調海船萬戶府照磨延祐初以科目取士首應詔登進士第授饒州路同知浮梁州事遷寧國路總管府推官卒初

吳興趙魏公孟頫在翰林得載所爲文極推重之
由是文名隱然動京師凡所撰述人多傳誦史稱
其文章一以氣爲主而於詩尤有法度自其詩出
一洗宋季之陋云臨江范亨父序其詩曰仲弘天
稟曠達氣象宏朗開口論議直視千古每大衆廣
集占紙命辭教睨橫放盡意所止衆方拘拘已獨
坦坦衆方紆餘已獨馳駿馬之長坂而無畱行要
一代之傑作也又曰皇慶初仲弘與余偕爲史官

每同舍下直回翔畱署或至見月月盡繼燭相語
刻苦澹泊寒暑不易者惟余一二人耳虞文靖公
與仲弘同在京師每載酒詣仲弘問作詩之法焉
仲弘酒既酣盡為傾倒他日見文靖詩歎曰此非
伯生不能作也仲弘與虞范齊名其相與切磋如
此嘗謂學者曰詩當取材於漢魏而音節則以唐
爲宗又言用功二十餘年始能會諸法而得其一
二故當時之論詩法者以仲弘稱首

雪軒

北風海上來大雪何壯哉上下九萬里洗淨無纖埃君
家十二樓軒窗洞然開吹笙擊鳴鼓呼賓與銜杯名言
落四座大笑聲如雷舉頭望長空高興驚冥鴻仙人五
六輩飛下白雲中粲粲明珠袍相從萬玉童問君何所
事未就丹鼎功翩然却攜手共入蓬萊宮

桶底圖

巨鼇奮其首戴山出海中神人擇所處共構金銀宮凭

高開戶牖屈曲互相通女仙七十二顏色如花紅一一
執樂器奏曲殊未終世傳桃源圖共徵彭澤翁此本出
異士雕刻尤精工天地極廣大爲地當不同我願學仙
道積久乃有功鍊形去滓穢五色浮虛空一朝乘風去
浩然入無窮

次韻景遠學士立春日二首

大雪入歲莫其兆爲有年漙漙始彌旬父老怨苦寒平
旦上馬去重裘忽如單況彼牛衣子束縵噓微煙賴有

固窮節猶念及古先

人事重名實趨向盡百端
丈夫負雄氣動欲追古賢
於意少不慊自放江海邊
登高望八極雲氣生我前
萬事何足問所須惟酒錢

送淳安徐教諭之任

握手出南城眷眷從此辭
蒼茫寒江色日暮浮雲滋
大舟挾雙櫓輕若駟馬馳
淳安衆才彥竝遲得師資
擊鼓會高堂帷帳春風吹
執經列座下質問無畱疑
平生五

車書少出胷中奇歛然聽佳譽庶用懌我思

太古雪爲楊友直賦

往時天大風能吹華山裂墜此一卷石或云太古雪粵
自開闢初雲氣所凝結已經六萬歲變化同巖嶭望之
色正白表裏共澄澈塵土不能浣光采耀日月願君勿
愛此特以獻金闕回中避暑時持用消毒熱

偕虞伯生魏雄卿魏池燕集分韻得閣字

侯家有貴客置酒燕池閣溽暑方盛極風雨俄大作移

楊相簸蕩蒲荷紛偃薄亂叫失蛙黽回翔迷鶴鶴街流
汗穢盡竇湧波濤惡喧聲劇降殺神氣欣洗濯趣歡爭
酬酢獻笑雜歌嘏益弛劍珮嚴未厭觥籌錯調燮維理
得滲漉宜施博和澤布原野涇煙散城郭嘉蔬已萋萋
良苗常濯濯吾徒家食餘豫有豐稔樂

題金壇宋氏自怡軒

白雲生何許萌芽自山石厥初僅毫末須臾大充斥蔓
延塞虛空日月爲昏匿或時爲霖雨庶類蒙潤澤或隨

飄風散起滅竟無迹相緣千萬變發色黑青赤畸人飭
棟宇遠俗喜幽闌開軒納高曠撫翫自怡懌人情慕富
貴驅逐不暫息轉盼失故常在已何所得上下數千載
往事猶歷歷於焉服聖訓無用苦沉溺昔年陶隱居常
作帝王客挂冠神武門作詩寫胸臆超然處物外可謂
貞且白何以企若人鞠躬修道德

礪松爲丁師善作

澗松高百尺磊落多大節連根抱危石古色黑如鐵隆

冬方沍寒山中積霜雪蘿薦悉枯死蒼崖猶凍裂此時
唯老榦峭直不摧折國匠求美材瞻望歎竒絕險阻不
可致既作復中輟我願驅六丁操斧隳嶺嶸得此棟梁
材持以獻天闕

劉將軍詩

交趾小蠻夸去國將萬里土產無異物其人狀如鬼溼
熱生瘴氣疾者無不死天兵雖南征棄之良有以往年
鄂州省綏靖失其理交馳赤白囊來告犯邊鄙遣人覘

虛實在廷孰可使矯矯劉將軍一旦備行李有才兼文武不但善弧矢深入險惡地限敵纔一水介者數百人視之若螻蟻移文至其國詰問事終始指摘中利害文辭更深美報書禮甚恭敵邑何敢爾疆吏爭怨隙構煽乃爲此賄賂却勿受足以振綱紀威聲聞遠方一邊禍爲弭國家方全盛武備不可弛如此將帥才宜歌宿衛士

古木詩

大木生何許乃在泰山隈泰山崖石裂怒水響如雷浸
潤長膏液根株日以培縱歷千百載霜雪不能摧長安
天子詔欲築九層臺臺上構宮殿青雲共徘徊匠氏走
海內博求棟梁材萬夫治道路揮斧重林開大器當大
用小器易翦裁有如豪侈士蹤迹困塵埃適可厚自養
毋為興歎哀

題文丞相書梅堂

大厦就傾覆難以一木支惟公抱忠義挺然出天資死

既得所處自顧乃不疑惻愴大江南名與日月垂我行
見遺墨再拜墮涕洟名堂有深意亦惟歲寒枝可知平
昔心慷慨非一時我我著棟宇昭昭示民知勿使風雨
敗永慰千古思

塞上曲

沙塞何窅窅樹短百草長大河屈曲流不復辨四方驅
車日將夕黑雲隱長岡人馬俱飢疲解鞍飲寒塘張坐
逐平地擊火燒烏羊漣酪過醇酎搖艷盈杯觴既醉歌

鳴鳴頓跼如驚狂月從天外來耿耿流素光悲風動寥廓拂面吹胡霜白鴈中夜飛參差自成行一箭落霜羽挾弓負豪強中情無畱滯千載能鷹揚

偶題

叢生園中草蔚蔚媚幽姿乘時各敷榮皓色被綠枝似有微香發秋風輒吹之入人襟袖中亦復可憐茲詰朝步荒畦莖葉稍離披飄零即已矣霜露不爾私榮悴既有時小大何異而幸愛七尺軀天道不可誣

夢讀退之詩頗奇詭已覺記其大旨作此篇

自聞蓬萊山大林夾長巒上生癭藤蘿下生荆榛管仰
不見天日藏蓄霧雨寒仙聖常所處沮洳亦少乾雖云
跨鳳凰出入傷羽翰哀音起空洞令人鼻準酸我欲訴
上帝爲施鐵鑿鑽琢落石側裂化爲千丈磐瓊樓與玉
殿玲瓏相通寬日月文戶牖光射青琅玕而我從吾師
來遊樂且般呼吸養元氣華腴生肺肝萬劫永不死如
循環無端竊爲仙聖慮炳然心若丹上帝如許我致此

亦何難

雪後次韻鄭集之

雪後登高望江山信奇哉重岡起且伏相連白皚皚水
官方謝事雲氣霽然開六龍翻滄海赤日從中來萬物
將蠢動忽如登春臺木行味正酸含菱先屬梅天時亦
相應初昏占斗魁遨遊自茲始入林踐蒼苔西湖青澗
澗西山高崔嵬長松更千載老枝多折摧名僧弣精舍
靜謐依巖隈伊予實放士正可誅蒿萊情深惟痛飲毋

客發新醅家人欲求我但見白雲堆機心無自作可使
絕嫌猜君辭如泉湧我醉如山頽卜居同里巷時時得
追陪爲瓶或先罄此恥當及壘大雅歌治世其音不宜
哀有倡必有和愧我非長才美哉春雪篇雲漢共昭回

次劉師魯韻

三年客上塞日夜懷舊丘飢來迫我去何暇爲遠謀四
顧無一親此身如羈囚悲風動沙漠回首令人愁道路
已漫漫歲月復悠悠丈夫四方志至此何所求買船發

河上河水亦南流攜鉏理荒圃吾疾日已瘳飛鴈至江
潯北風天始涼是時禾黍登斯人亦少康皇天降厚德
胡爲私一方燕趙及齊魯人飢或相戕奈何有積廩如
陵復如岡生非肉食者此憂心甚長亟謀樹臬壤翦茅
覆小堂我志亦易豐歲祀有特羊

橘中篇

竝海無山林莽莽皆平疇君家擇地利卽此營菟裘雜
樹作藩屏青紅間綢繆其中植橘柚擁蔽枝葉稠盛夏

開白華朱實懸高秋飛霜虐萬物寒風助颼颼凌晨察
變候策杖巡維陬是何黃金多暴露宜藏收採摘資衆
力轉輸及他州子長傳貨殖謂此同列侯上充國家賦
下貽筐筥謀千縑可坐致何必龍陽洲

次韻袁伯長

盤盤海底石竝樹青琅玕至陽生至陰龍宮常苦寒揚
光炫朝彩吐氣蒸微瀾根株歷千載莫測榮悴端端如
巢居子草木皮衣冠超然去人羣取友蹄與翰日誦黃

帝言浩歎淚闌干奈何天下治必以雲爲官佩劔黃金
環咀丹白玉盤自聞至人德積熱生肺肝黃塵日莫起
對面不相看三山在何處使我師王韓聊歌紫芝曲倚
君清夜彈

題屏風畫商山四老人

飛雪灑遙野衝波蕩無垠蟠蟠山谷間居此四老人下
爲民庶師上作王家賓清風渺何許馳想寂莫濱

遣興偶作

春蔬茂前畦
菁菁有顏色
珍禽叫溪樹
過耳亦一適
用是易吾慮
毋爲自襮積
放浪天地間
無今亦無昔
古人得意處
相與元不隔
如何故人心
未照我胃臆
微言及纖芥
實出左右力
豈憚沒係躋
人生且爲客

書懷寄杜原父二首

吾生何爲者
穉年志頗高
神仙與功名
壯思躍秋濤
中宵豈無寐
悲甚幾欲號
後來失所養
百數患難逃
竭力奉甘旨
出入身甚勞
舊書益遺忘
九牛存一毛
稍後與

人事忍情如忍刀旦夕自惟念未足非兒曹常欲力道
德屢失迷所操區區習蠹簡對案夜焚膏儻然有所得
中心樂陶陶忽如從古人握手共遊遨攜持亦何事庶
用娛蓬蒿追思作詠歌示之必賢豪丈夫生世間毋論
賤與貧夙發多意氣往往任真松柏生高岡挺然固
出羣不為霜雪阨不為風雨春得時可行道節義亦足
伸吾生託下土所識凡幾人窮交獨相慰笑語亦復
親

遙望山下雲旦起迷羣岫老鶴巢其中縹緲標末構長
鳴對秋月鳴罷復俛味散入墟落間聞者莫能究顧惟
雲外客娛心飲醇酎於此何如哉吾亦有所邁往來常
泛舟滄流浙江上是時秋風高濤水日夕壯瞬息踰百
里猛捷莫可狀倚船縱觀久力可騎鯨况顧謂吾友言
爲樂頗豪放斟酌尊中酒懷抱益虛曠常從山中遊實
愛巖谷幽長松蔭泉水四時清如秋佇立輒良久忽欲
忘其儔吾聞古來人山居多名流此語或可信市朝安

得畱

贈執中允上人

南山多白雲，澶漫塞崖谷。中有龐良叟，寂莫卧林屋。前
門樹高松，後戶植幽竹。孤風相纏繞，波濤驚蕩沃。梵文
五千卷，誦說盡精熟。時時發清唱，鏗鏘擊金玉。伊余走
海內，一見輒歎服。願言從之遊，澹泊心自足。

次韻韶卿壬寅元日又三日聞游人頗盛之作

堂堂宵雨過，栗栗曉寒仍。獻歲人同得，東郊事復興。杜

門疑我拙有句愛君能且驗臨階草從今日漸增

寄劉師魯

想君遊宦處正值洞庭湖落日波濤壯晴天島嶼孤舟
航通漢沔風物覽衡巫天下文章弊非君孰起予

贈吾子行

春雨連城闊春雲暝戶多長衢方淖淖小水亦風波抱
獨能如此思君可若何便當乘興去著屣一相過

東陽十題 錄六

焦桐

只作全生計，唯存半死心。
芻蕘猶不置，斤斧重相尋。
遂使焦釜誰爲愛，古琴有材不足恃。
愁絕念知音。

蠹簡

往古韋編在何年，始汗青蠹蟲淡卜宅。
科斗少成形，泯滅隄秦火。
搜羅出漢廷，斯文天未喪，不敢望全經。

塵鏡

收藏無寶匣，歎息網絲懸。
孰使明爲暗，如觀醜勝妍。
玉

臺終寂寂金鵲尚翩翩政訝開元日虛將盛事傳

廢檠

二尺書檠在如今久弃捐魚膏雖有焰蠹簡獨無緣
牆下偕遺礫窗間帶舊煙却觀提挈處辛苦悔當年

敗裘

寂莫牛衣子能無敝縕袍塵埃須浣濯蟣蝨費爬搔
意味存雞肋寒涼視馬毛千金旣銷鑠猶聽朔風號

卧鐘

漢殿經焚後，喟然卧草中。
雕殘牙板廢，鏤濕土花蒙。
追蠡難陳力，華鯨不奏功。
待賢初設簾，想見古人風。

送屠存博

君往金陵郡，於予亦有聞。
海環平野盡，山出大江分。
未召元司馬，誰憐鄭廣文。
自今師道立，章薦必紛紛。

渡江寄俞仲連

舟濟大江濱，中流日欲曛。
鹵翻沙際雪，潮落渡頭雲。
鯨躍常知候，鴻飛不亂羣。
頗思論勝槩，把酒莫如君。

奉題伯父雙峰樵隱四首

山出雙峰秀溪流一派清
土風存禮讓人事省將迎
路逐高低過田隨早晚耕
家林有如此南望每關情

石樹盤根瘦沙溪激浪清
竹間看犢卧木末見人行
穡事常分力樵歌輒和聲
從來攜杖處不礙白雲生

山曲兩三家相過路不賒
對門開竹徑臨水種梅花
酒熟畱人醉詩成任客誇
時時談舊事相看鬢垂華

草滿三春綠山畱萬古青
呼兒欣解意應俗憚勞形
採

茵敲寒木收魚照夜汀
祗應老崖谷束帶尚論經

送方韶父先輩遊五湖

蕭蕭垂素髮渺渺泛滄波
過眼江山好離家日月多
詩名終不朽世事復如何
一往五湖上蒼茫問釣蓑

和張仲實之吳興舟行雜詠

水程通百里雲樹隔千層
鶴髮歡相見龍門羨獨登
文辭母乃壯梧杓尚能勝
仰止情何極吾爲附驥蠅

寄題羅氏別業

門前臨白徑長日少人行野樹重重暗溪流脉脉清山
形元不斷雲氣自相縈已似龐公隱何時重入城

次韻江行四首

潮頭終歲白沙腹有時皤利涉他州柁終更古戍天
依臨海樹風作滿江波亦有投竿意還聽孺子歌

藜羹真我食辟荔亦吾衣養性隨時足全生徇物非秋
蓬猶未定風樹莫相違謾作煙霞想曾無羽翼飛

路僻行來好天清望極遐白魚翻急浪黃犢卧晴沙桺

吐千條葉梅殘幾樹花佳辰從此數
厯厯看韶華
子胥因諫戮茲事幾經秋顧爾忠難
揜于今憤不休天
風吹地轉海水入江流欲問鴟夷處
茫然使我愁

送孫大方歸朝元宮二首

高卧林泉表超然謝世紛空山鳴白
雨古石繫蒼雲不
作夔龍伍甘從鹿豕羣都門遊宦客
回首總慚君
爲樓因地勢四面盡青山路落秋城
外河流曉樹間鴈
飛雲莫莫龍現雨珊珊建木光華盛
何時共折攀

題信州先天觀圖二首

高林褰翠氣虛谷散虹光
道士多騎虎仙人自牧羊
澗泉通地遠山嶺際天長
戴子文爲記流傳示不忘

四圍山不斷狀若碧芙蓉
谷遠含風細崖深下露濃
茂林藏虎豹陰洞伏蛟龍
恍惚神人降浮空羽蓋重

次韻引浚儀公題蘭竹卷子

樹蕙連叢竹祗應族類同
相依巖石畔併入畫圖中
勁葉凝清露危梢倚碧空
諒非高世士此意固難通

惠崇古木寒鴉

江上秋雲薄寒鴉散亂飛未明常競噪向晚復爭歸似
怯霜威重仍嫌樹影稀老僧修止觀寫物固精微

送林季羽入京宿衛

青雲自致身磊落見斯人卷袞辭蒼麓垂纓侍紫宸漏
殘珠閣曉香煖玉爐春儻厭承明事歸來衣錦新

送徐義父入京

幽燕向日邊裘馬去翩翩磧迴沙如雪河窮浪入天上

書雙闕下待詔五門前壯節多奇遇無煩媿往賢

中秋

攬雲憑結構步月上林皋不記金尊竭頻瞻玉宇高神
清存夜氣天闊數秋毫百尺樓如在何煩卧汝曹

送王元禮歸平城

燕趙多奇士遺風有固然射雕猶絕藝屠狗亦名賢形
勢威天下風流號北邊送君歸此地亦欲奮吾鞭

題青田葉叔至野清堂

爲堂殊軒敞在野興尤濃
白水流千折青山繞百重
樹麻行旆旆時木倚童童
相對漁樵話終朝亦罕逢

送張宣撫使嶺南

奉使入蠻煙終軍始妙年
抗旌辭朔野擊楫渡湘川
翠竹侵巖際黃茅盡海邊
狼荒非善地爲戒莫畱連

送李侍郎使安南

九秋天色晚萬里送君行
馬首塞雲起腰間寶劍橫
奉揚天子命慰答遠人情
直渡蠻江水炎氛一日清

送吳清叔

驛路程雖遠帆風勢甚適青山隨岸去白水滿江流
牢落添新恨繁華憶舊遊只今歸去好把釣卽槎頭

次韻夏仲勉

不喜爲文富長憂得酒慳尊壘堆案上筆硯棄牆間
有傳追王績無書繼賈山貴人能慢士往見亦胡顏

冬至次韻張宣撫二首

北去關河遠南歸歲月長屠龍雖有技相馬獨無方
雲

水連天暗霜無滿地荒客遊應未已塵土在衣裳
瀛海無消息冥冥鳥道長已驚雙鬢短更待兩瞳方落
日依平嶂洪河入大荒憂來那可得揮淚欲沾裳

酬吾子行

耿耿思朋舊悠悠涉歲華既依秦大姓方問魯東家雅
道將誰與新詩敢自誇祇今能會合不憚路途賒

贈周景遠學士

朔易回元氣人才起俊流聲華當翰苑文采冠中州振

珮趨臺閣抽毫侍冕旒人傳鸚鵡賦家有鸛鵲裘式觀
黌宮立共惟祀典修一朝虞或缺六器俾旁求俎豆俄
成列蘋蘩遂可羞中朝方有道下士實同休已及歸鴻
候姑爲食蟹謀朋簪多繾綣使節少淹畱曉日花間酒
春風柳下舟篇章微品藻山水媿清幽鄭璞曾先辱隋
珠不暗投考槃雖自引闕觀亦吾憂簡冊銷長日蓬蒿
憚凜秋論高非縱誕興遠託賡酬尚憶駒千里胡能貉
一丘何當把君袂相逐馭風遊

壽杜尊師

澹蕩風雲氣沈雄虎豹姿繇來天下士絕異里中兒苦
縣常栽李商山舊采芝不當卿相位猶可帝王師始有
巾車獲俄蒙仄席知賢才方竝用讒說遽相欺鷹角將
巍冠龍鱗敢逆批變通俱合道舒卷各乘時築室煙霞
祕還丹日月遲願公長住世須作後天期

春雪次陳元之韻

寒氣何悽慘春空正杳冥東皇收橐籥北帝駕軫輶
混

沌包三極繽紛走百靈散珠分的皦擊玉碎瓏玲始試
朝藏日俄疑晝隕星危橋無客渡曠野少人經百沸疑
奔瀨孤撐沒峻岭林荒顛凍雀崖滑墮哀挺哀哀隨風
舞颼颼雜雨零遺蹤初得兔匿種詎憂螟眊昧傾農室
歌謠徹帝庭陽春將布德品類各成形捉筆題新句持
杯酌舊醺今朝須痛飲醉卧不須醒

送張仲實之宜興

南渡邦初造西山將獨賢立功何赫赫流慶尚綿綿報

國橫戈數登壇授鉞專風雲方際會江海固周旋控險
千鈞弩臨危七寶鞭忠誠深足仗智勇實兼全自返高
橋役端持宥府權兵威終抗敵人力可回天甲第無踰
者諸孫固穎然初生同燕頤有美自嬋娟善學聞當代
能詩起妙年衛公猶故物鄭老竟寒氈矯矯青雲器泠
泠白雪絃同遊雖未達自視已無前政事兼畱意時髦
孰比肩知機無轉石縱辨若奔川特達羣公薦酸寒衆
目憐姑為文學掾會覓孝廉船必見公侯復無論雨露

偏秋風鵬鶚健萬里正翩翩

送丘子正之海鹽州教授

有美區中彥由來志不羣舟航了吳越表馬向燕雲才
思庾開府風流王右軍得時宜玉筍稽古賸香芸果拔
英髦穎遙收翰墨勲諸公希宦達半世有辛勤奔走空
皮骨躋攀不寸分夏侯何地芥郢匠實風斤嗟我慚鷗
鷺棲山似鹿麋偶來詢故老因得友多聞湖舫曾秋雨
河橋幾夕曛過從方不散慘別亦奚云俎豆班侯泮鹽

締薄海漬未論虞廩米聊樂魯宮芹此日顏應抗之人
德已薰化爐新鼓樂學殖重耰耘行矣穿黃落歸歟守
白紛贈言將底事努力在斯文

士開燕岳氏溪堂有溪山新月上江海故人同
之句邀予及張仲實曹克明同足成之

置酒秋風裏憑闌野色中溪山新月上江海故人同縱
浪情何極畱連燕未終三鱸來上客五馬會羣公積水
輸清氣微霞銜近空將昏林尚白及早稻先紅極論追

遐古深情念困窮尚觀儀秩秩未遂樂融融才著當朝
傑文誇命世雄數君今日選宜爾集南宮

次韻黃子久喜晴三十韻呈汪知府

霞彩晨張錦蟾光夕挂鉤陰霾雖盡解淫潦豈全收
動遨遊興還聞倡和謳容容追舊賞歷歷破新愁
騎氣城邊縱龍光海際浮艷妝來士女盛服擬王侯
在藻羣魚躍依林白鳥啾河流交不斷山勢轉相繆
物理歸含毓人情釋怨尤娛娛從老穉燕樂逐朋儔
幄帟分郊次

幃帷擁道周聯翩馳畫舫巖磔累朱樓貿易通遐壤繁
華壓大州聚廬千井富接棟萬家稠已戒增周口仍催
浚下流嘉蔬連隙地宿麥徧高丘曹事虞多廢胥徒戢
過求醲恩方竝育和氣與同遊期會朝先往追隨莫不
休露華開的的風葉振颼颼拾芥非無日登禾即有秋
朝家期少試鄰郡固難侔共羨光華著還矜德業修在
廷爭進薦當宁免垂憂玉漏傳臺角金尊出殿頭秉心
存正道造膝待嘉謀履直恒如矢防偏或類舟第誇緇

竹簡不省計牙籌善對慚鳴鶴能歌媿飯牛過情蒙許
與彌月爲淹留

再用韻贈黃子久

自惟明似鏡何用曲如鉤未獲唐臣薦徒遭漢吏收悠
然安性命復此縱歌謳石父能無辱虞卿即有愁歸田
終寂寂行事且浮浮不假儕羣彥真堪客五侯高人求
款洽末俗避喧啾藜杖常他適繩樞每自繆與人殊用
舍在已寡愆尤濟濟違班列俛俛遠匹儔能詩齊杜甫

分道偏莊周達飲千鍾酒高登百尺樓艱危仍蜀道畱
滯復荊州鶴度煙霄闊龍吟霧雨稠東行觀海島西逝
涉江流自擬需于血何期渙有丘古書嘗歷覽大藥豈
難求撫事吟梁父馳田賦遠遊堂名希莫莫亭扁效休
休檻日吟東濟窗風背北颼鳴琴消永晝吹律效清秋
雅俗居然別仙凡迴不侔多聞踰束皙善對邁揚修儘
有匡時略寧無切已憂塵埃淡滅迹霜雪暗盈頭始見
神龜夢終營狡兔謀雪埋東郭履月滿太湖舟急景誰

推轂流年孰唱籌凌波乘赤鯉望氣候青牛好結飛霞
佩胡爲淹此畱

寄王繼學二十韻

聖主敷皇極元臣建上台虛心求俊乂削迹去姦回拜
命超凡品知君秉大材淳風隨日播公道應時開負鼎
資烹飪操刀貴剗裁銛鋒行肯綮異味合鹽梅廟議常
參洩朝班復共陪艱難須仗助豁達遠嫌猜遺佚聞風
起英豪接踵來經綸非董賈辭藻亦鄒枚在野思羅致

盈庭想轂推既將龍作友惡假鳩為媒走也今留此公
乎可念哉執竿猶海上扶耒即巖隈自守幽人意寧虞
俗子哈舊遊辭玉府故事憶金臺落魄江湖阻蒼茫歲
月催丹心徒耿介素髮已毳毳勿謂交如水能忘恥及
壘飛黃當駕馭猶足異駑駘

送鄂勒哲依圖同知

來游天子學藉甚有聲華論事依三策藏書至五車姓
名題鴈塔譜牒記龍沙自可編青竹兼宜綰白麻文工

金有價貌美玉無瑕興盡方豪飲篇終不浪誇豈惟吟
芍藥曾是賦蒹葭事莫分難易人須辨正邪月中初折
桂天上始乘槎勿待秋風起宮門聽鼓撾

贈郭集賢

衣冠趨近地藻翰集羣賢給事黃門裏抽毫黼座前佩
龜金作紐賜馬玉爲鞭御酒傾壺滿宮花插帽偏清光
依日月逸思繞風煙記憶踰三篋吟哦過百篇自惟叨
侍從不敢廢周旋秋著隨車獵寒當襍被眠蘇瓌才既

敏陸贄寵尤專自爾紆皇眷於焉理化絃詞臣方進用
才大畢騰騫可念如揚子蕭蕭獨草元

寄周御史二十韻

同游河北後共抵浙西初獨倚知心舊翻成會面疎三
年仍契闊萬里更吹噓小子無奇氣先生有過譽見稱
司馬賦求授夏侯書倉卒排歸計淹畱著寓居已非與
俊逸猶是主癰疽名士多親我諸公或請予駕言將采
芑卽事欲連茹顧爾傷流矢居然恨倚閭驚心聞杜宇

過眼易蟾蜍忽召抽金匱俄徵論石渠文章殊賈馬謀
略匪嚴徐薄技終難效窮愁只自如尚矜存敝履不肯
曳長裾與作棲梁燕寧爲涸轍魚儀形長日想懷抱幾
時攄奏疏聞當宁抽毫待直廬烏臺絃既改鼇禁席仍
虛馬首何繇見分光興有餘

雲山圖爲茅山劉宗師作

長江千萬里奔浪薄高雲龍現誰能覩猿啼不可聞迂
迴因地勢昭晰應天文劒氣秋如洗珠光夜欲焚連峰

俄筭迸斷岸復瓜分句曲臨東極巖頭有隱君

題康里氏家譜

國受輿圖廣家傳譜牒詳馳聲繇鴈塞拓迹至狼荒轉
戰踰千里來降盡一方奮戈回白日列戟耀清霜破竹
收城邑分茅賜土疆弟兄皆勁悍父祖各雄強相印仍
兼綰兵符更迭藏排衙開萬弩納笏過三牀已及書宗
祏還宜紀太常後人能繼紹千載有輝光

贈魏虛舟少府

西蜀文章伯東吳閥閥家族傳貞觀舊躅繼信陵遐雅
度人難測高名衆共誇爲楨材不小韞櫝玉無瑕鳴鳳
占諧吉乘龍偶契嘉三牀邀納笏萬弩護排衙世賞官
仍及朝參寵復加天顏垂眷顧地肺侈光華緩步方鳴
玉高情欲泛槎翻然歸翠麓姑爾奉黃麻彭澤還栽柳
河陽不種花投閑銷日月訪古略煙霞臘蟻常開宴春
魚每看義興來恒放逸賓從任喧譁閣靜褰珠箔窗虛
閤綠紗琴彈多古雅詩就輒妍姱願作梁間燕徒慚井

底蛙執鞭曾莫効，抱瑟敢長嗟。
戀戀情終在，悠悠道苦賒。
春風吹去旆，翹首又天涯。

送丘子正之海鹽

珠生滄海底，玉韞碧山中。
夜氣交明月，陽精現白虹。
有賢兼重價，當代振英風。
好學由天性能書，至國工知名。
傳冀北作賦擬河東，始欲徵揚子。
旋聞薦褚公，陰符難獨美。
遺教實爭雄，絕藝雖宜進。
奇才自不同，交游傾上國。
掄選屬南宮，鄧禹官初試。
匡衡對漫通，海邦終寂莫。

學館尚穹崇已注千人錄當成五典功星辰皆在水渤
澥信浮空把酒歡何限乘槎興不窮文章趨浩瀚物態
入牢籠子必登芸閣吾方守桂叢索居彌寡陋荒業孰
磨礪弗獲披雲霧惟思對華嵩知音期郭泰流俗易王
充江海從茲逝飄飄任短篷

一作
轉蓬

送朱仲山歲貢入京

昭代陶淳化多方出異材鳴岐聞鳳鳥清道服龍媒養
素稠山僻觀奇載籍該爲珍如寶璧奮蹟起蒿萊未展

垂綸趣初承勸駕催羔羊填委巷駟馬踐輕埃戰藝鋒
無敵搜賢網正恢上書追偃樂作賦竝鄒枚奮發真從
此游觀亦壯哉雲霄千萬里瞻望重徘徊

招真觀圖

欲學無爲道來居小有天精神消物怪采色變風煙恬
憺如天德虛無象帝先高風何特達古迹尚流傳地涉
鴻荒表山開混沌前谷幽疑鬼聚峰巧類人鑄疊起三
重閣分流百道泉巖穿畱虎迹石冷逗蛟涎放浪曾無

日遨遊未有年古經披覽罷毛骨爲醒然

寄沈少微金華山隱居

巖前通細路嶺外接危峰梯磴踰千級煙霞過萬重緣
崖收異筍步壑數長松隔屋號朱虎當窗現黑龍蘅蘭
爭酷烈桃李角鮮穠隱士多相過仙人庶可逢第能安
性命何患改顏容煉鼎丹砂熟傾壺白酒醲微茫追絕
響瀟灑振孤蹤鄉里宜同好他年必子從

送侯尊師歸蜀

北上關河遠南歸歲月賒飄飄攜短劒杳杳泛靈槎別
岸秋濤掩前山曉霧遮欲攀青桂樹先採白蘋花天道
元無極浮生即有涯舉杯吞夜月引袖拂晨霞獨跨冲
天鶴能追赴壑蛇祗應投老去長日煉丹砂

春晚喜晴

積雨俄經月新晴始見春蒼苔侵別墅綠水過比鄰性
僻居宜遠身閑景易親無詩排世累有酒縱天真循圃
花粘履憑闌柳拂巾歌呼從穉子談笑或嘉賓漸喜漁

樵狎仍欣鳥雀馴幽情延薄莫浩思集清晨養拙元非
病爲文敢自珍杜門緣底事作計懶隨人

次韻虞彥高遊陽明洞

憶昔神禹奠九州茲山會計功始休諸侯玉帛渺何許
但見萬水從東流衣冠永閉陽明洞夜聞鬼哭巖之幽
珠宮貝闕號龍瑞天造地設非人謀槎牙怪樹凍不死
化作千丈蒼玉虬丹洞呀然仙掌裂翠峰巧矣蛾眉修
梅梁飛去鐵鎖斷徃徃雷雨生靈湫軒轅緱神極祕怪

海上笙鶴時相投平生閉門讀史謳子乃探穴先吾遊
明當挾子期汗漫題詩更在最上頭不妨山水樂吾樂
豈有飢溺憂民憂故家喬木尚可求有子有孫百世畱
卧橫玉簫泛歸舟吹散萬斛江南愁

古牆行

建炎白馬南渡時循王以身佩安危疏恩治第壯輿衛
縮板栽榦繇偏裨下鍤江城但沙鹵往夷赤山取焦土
帳前親兵力如虎一日連雲興百堵引錐試之鐵石堅

長城在此勢屹然上功幕府分金錢謹聲如雷動地傳
爾來瞬息逾百年高崖爲谷驚推遷華堂寂莫散文礎
喬木慘淡棲寒煙我入荒園訪遺古所見惟存丈尋許
廢壤終嗟麋鹿游飄零不記商羊舞王孫欲言淚如雨
爲言王孫母自苦子孫再世墮門戶英公尚及觀房杜
如君百不一二數人生富貴當自取况有長才文甚武
公侯之後必復初好把家聲繼其祖

題山石猿鳥圖

萬卷堆中昏欲睡忽見畫圖醒我意眼前崖谷起嵯峨
便似著身遊此地梗枿櫛櫟大百圍奔泉透石辟厯飛
玄猿孤峙憩美蔭下視白鳥娛清暉昔聞虞舜狩南嶽
君子相隨化猿鶴往時此輩猶爾爲慨想雲林真可樂
拔劍斫山山露骨山鬼呶嚶安敢怒祇今踴躍歸去來
莫愁無覓誅茅處

李伯時畫浴馬圖

古稱難畫莫如馬近朝惟數李伯時不至天閑觀帝服

如此骨相何由知頭顙渴烏尖插耳竟渡流沙輕萬里
圉人牽浴恒凜然復恐化龍奔入水貧居里巷無馬騎
徒步出入多傷悲大脰薄蹄何足願退立道旁塵滿面

題王起宗畫松巖圖

雲起重巖鬱凌亂長松落落樹直榦若人於此結茅屋
爽氣飄然拂霄漢艤舟之子何逍遙從者偃僂攜一瓢
山中無日不閑暇跋涉相顧凌風飈始知王宰用意高
使人觀圖鄙吝消世間未必有此景塗抹變幻憑秋毫

丹青遊戲固足樂收絕視聽搜冥莫向來為政殊不惡
乃爾胃中有丘壑

題華岳江城圖

華岳能詩世有名學畫丹青亦豪放此圖似寫安慶城
雉堞樓臺儼相向北風將至江面黑千艘萬艘爭避匿
滄溟涌溢水倒流南嶽動揺天柱側蛟龍戲落秋潭底
素練平鋪八千里時清好作釣魚翁閑弄輕舟煙霧裏
神馬歌次韻陳元之

神馬來自崑崙西有足未始行沙泥朝趨欲出飛鳥上
夕逝直與奔星齊綠髮半散插雙耳赤汗交流攢四蹄
風神秀猛陜天地豈顧燕蔡并渠黎時時牽浴臨清溪
對人誇殺黃須奚玉沙之禾中芻秣不啗隄頭枯草稊
與君側耳聽長嘶凡馬不聞生駉驪

古劍歌爲吳真人作

閑閑真人藏古劍敬之如神不敢忽賓客時來求一觀
輒有悲風起倉卒人言此是金鐵精良工煅煉久始成

動搖天地合變化摩蕩日月含光精昔年有蛟起江中
口吐烈焰燒長空下民昏溺上帝怒雷電往擊皆無功
嘗持此劍斬蛟首流血滔滔漫廬阜傳記傳聞時既久
不意世間今尚有吾過下里多惡氛魍魎魑魅能食人
請君爲我絕此怪一洗宇宙長清新

題趙千里山水扇面歌

公子丹青藝絕倫喜畫江山上紈扇祇今好事購千金
四幅相連成一卷春流漠漠如江湖飛煙著樹相有無

嵐光注射翻長虛白玉盤漫青珊瑚追隨流俗轉蕭疎
對此便欲山林居旗亭花發酒須沽舟行爲致雙提壺
抱琴之子來相須醉歸不省何人扶旁有飛泉出巖隙
掣電飛霜相盪激蛟龍不愛鯢桓食但見垂綸古盤石
人生萬事無根柢出處行藏須早計一丘一壑儻如斯
便可束書從此逝君不見鄭子真躬耕谷口垂千春毫
芒世利能沒身汝胡齷齪爲庸人

題秋雨長吟圖

雨暗秋天黑如墨窮居茅屋出不得終日長吟復短吟
吟罷令人轉悽惻飢猿抱樹屈雙肘病鶴拖泥垂兩翼
何當策杖過溪頭要看南山新翠色

竹樹圖

荊棘蒙籠迷竹樹亂堆古石蒼苔護縱獵青郊懷舊路
躍馬重岡追狡兔箭翎落地無尋處

題溫日觀葡萄

老禪嗜酒醉不醒強坐虛欄寫清影興來擲筆意茫然

落葉滿庭秋月冷
醉中捉筆兩眼花
倚檐架子歌復斜
翠藤盤屈那可辨
但見滿紙生龍蛇

題墨竹

嶰谷陰寒石如鐵
二龍僵立露骨節
春雷動地萬物活
畏汝飛騰衝石裂
攢青聚綠生巖幽
海濤聲引風颼颼
年年三伏林下卧
白晝慄慄如深秋

以上二首刻本
分作絕句誤

宗陽宮望月分韻得聲字

老君臺上涼如水
坐看冰輪轉二更
大地山河微有影

九天風露寂無聲蛟龍竝起承金榜鸞鳳雙飛載玉笙
不信弱流三萬里此身今夕到蓬瀛

仲弘詩前輩以宗陽宮望月一首爲

絕唱

次韻錢唐懷古四首

江湖清濁自天開鴻鴈鳬鷺與往來黃道星辰環太乙
紫雲宮殿擁蓬萊論文競奏王褒頌獻壽深傾阿母杯
九域輿圖今混一百年耆舊獨興哀

斜界鈎陳通大道中分魏闕對層巒雲生殿上金鑪暗

露下庭前玉井寒
江漢飛龍俄窅窅
滄漠泛鷁竟漫漫
中天會合寧非數
坐見蒼生奠枕安

山回禁籞入雲長
無復陳兵衛兩廂
千石金鐘埋野草
萬年珠樹落秋霜
龍文不徙陽人聚
烏篆終降軹道旁
九市塵埃來袞袞
一江波浪去茫茫

化人宮闕被層阿
棟宇高低若湧波
翠石文章書日月
寶珠光燄燭山河
空桑說法黃龍聽
貝葉繙經白馬駝
誰謂一無超衆有
只今塵土重來過

題豐樂樓

崢嶸飛構壓名邦西望平湖東望江氣合重元蒙沆瀣
標存九域奠洪龐朝來散霧縈朱栱夜後流星透碧窗
倚徧闌干愁目眩飛鳶旋轉故雙雙

水樂洞

石林求路轉聱牙來訪香巖大士家雨過門前生薤葉
風行隴上落松花懸崖滴水鳴金磬激澗流泉走玉砂
欲適山林去城市久知寂寞勝紛華

題拱北樓

殷地鼓輦迎日出倚天梁棟與雲浮北瞻帝闕三千里
南控臣藩二百州江海無波沈固象旌旗垂野駐貔貅
鸞迴麗榜多深意繡袞于今有魏牟

次韻羅雲叔紅梅

玉人中酒殢芳華盡壓東風百種花
襖被冬深裁異錦
篝燈夜永障輕紗
纖蕤露沁蜂腰蠟
密葉雲蒸鶴頂砂
為問閨風何處在
相期高舉籥晨霞

紀夢

海上垂綸有幾年
平居何事夢朝天
蒼龍觀闕東風裏
黃道星辰北斗邊
治世祗今逢五百
前程如此隔三千
揚雄解奏甘泉賦
應有聲名達帝前

次韻陳子仁黃河二首

禹功疏鑿過憂勤
海內山川自此分
元氣渾淪通地脉
孤光迢遞貫天文
母金伏礫秋逾盛
陰火藏淵夜不焚
多少魚龍爭變化
總歸西北會風雲

一作萬里窮源何
日遂片帆西上破

曾雲

陰陽爲沴黃河溢北渡艱難擁萬艘齊楚百城防雉堞
淮沂千里避鴻濤耕鉏已失天時正流徙爭依地勢高
此日朝廷憂水患須明利害策賢豪

望海

海門東望浩漫漫風颺無時縱惡湍黑霧漲天陰氣盛
滄波銜日曉光寒豈無方士求靈藥亦有幽人把釣竿
搖蕩星槎如可馭別離塵土亦何難

送羅雲叔歸山中

黃石山原風物幽賤子往年曾一遊舊行楸柘已成逕
新藝禾麻應滿疇馮衍能忘白首歎謝安須爲蒼生憂
餘杭溪上明日發愁殺楊花吹客舟

畱別京師

囊衣託載道傍車人事怱怱歲欲徂風雨四更雞亂叫
關河千里鴈相呼蕪菁散漫根猶美桑柘蕭條葉漸枯
却向一作高丘重回首五雲繚一作飛繞帝王都

簡浙東萬戶蕭伯善

擇帥中軍自古難，獨分符節守藩翰。
夜鳴鼓角溪山靜，曉豎旌旗雨雪乾。
不待掃門知魏勃，豈須彈鋏識馮驩。
祇令四海無征戰，萬卷詩書好厭觀。

贈同院諸公

詔編國史有程期，正是諸郎曝直時。
虎士守門宮杳杳，雞人傳箭漏遲遲。
窗間夜雨銷銀燭，城上春雲壓綵旗。
才大名稱天下選，書成當繼古人爲。

玉堂夜直

直廬歲晏動羈情朔雪將飛覺夜明
金井輓轡哀響絕玉階瓊甃斷紋生
鮮花莫辨沿牆迹松葉時聞委砌聲
媿以不才同制作諸公此日負高名

寄維揚賈侯

經國長才世豈多羣邪嫉正奈公何
氣蒸雲霧藏喬嶽聲轉滄溟放大河
遠迹江湖猶棄絕驚心歲月屢消磨
鷗鵬自有垂天翼肯逐飛鴻入網羅

寄康大夫

遙想幰帷出郭時
先驅十里走旌旗
青山落日蒼茫暗
白水秋風慘淡悲
勁矢每隨前隊發
清笳偏逐後行吹
荊州未覺風流遠
縱飲還應到習池

寄袁伯長

幾年簪筆侍明光
直取才華補衛郎
祀事悉稽周典禮
頌聲須假漢文章
雲垂迴野鳴鞘遠
月滿高城下漏長
校獵合祛尤盛事
願聞作賦擬長楊

東湖四景爲大尹本齋王侯賦四首

朝來千騎出城闌，爲向東湖踏早春。
素練褰林雲氣薄，明珠穿草露華新。
山花獻笑開簷畔，海鳥忘機戲水濱。
記取當年賢太守，及時爲樂與斯民。

夏月湖中爽氣多，南風疊疊捲長波。
漁人舟楫衝蘋藻，遊女衣裳擘芰荷。
膾切銀絲嘗美味，腔傳金縷換新歌。
使君用意仍深遠，即此光華豈減磨。

暫停麾蓋擁輕舟，此日湖山屬莫秋。
采采黃花登几案，

離離紅樹散汀洲
傾壺浮蟻杯頻竭
下箸鮮鱗網乍收
莫向錢塘誇往事
白蘇未許擅風流

雲氣低藏十萬家
東湖飛雪又交加
玉禾舊布仙山種
瓊樹新開帝所花
別浦移舟聞過鴈
高樓凭檻見歸鴉
侯門似有相如客
賸賦篇章與世誇

即事

禁城曉色清如水
高下樓臺錦繡中
千樹好花連上苑
百壺美酒出深宮
珍禽競集高林霧
寶馬爭嘶橫岸風

人物此時俱盛極兩都絕勝漢西東

次韻伯長待制

揮鞭遠過御溝斜出院時時見暮鴉已入玉堂同視草
還趨瓊砌共觀花獸爐香繞窗前霧蠟炬光搖帳底霞
此去天津元不隔何須八月泛靈槎

送薛玄卿歸龍虎山

金門詔下羽人歸欲向山中採薺薇琥珀懸崖松樹老
琅玕倚澗竹根稀高巖蓄雨星辰溼古石懸雲逕路微

養性可無軒冕累遊塵元不浣仙衣

春雨

濛濛春雨暗重城莽若山林雲氣生
駕過東朝霑羽蓋
仗移前殿溼霓旌蒼松密掩巖頭鶴
翠柳深藏谷口鶯
明日不愁花爛熳新晴陌上有人行

題和碩布哈同知畫像

堂堂玉立照青春昭代由來重世臣
帶納掖庭聯衛士
分符江徼總編民鸛鷖裘煖鳴鞭疾
翡翠簾深翦燭頻

州縣三年姑少試驅馳休厭屬車塵

次韻黃子久獄中見贈

解組歸來學種園棲遲聊復守衡門徒憐鄒陽開金穴
欲效寒溪注石尊世故無涯方擾擾人生如夢竟昏昏
何時再會吳江上共泛扁舟醉瓦盆

懷錢唐故人簡應中父

幾年流滯客京師每憶江邊話別離落魄已甘心似鐵
蹉跎無奈鬢成絲草玄思苦無人問彈鋏歌長只自悲

滿目塞雲飛去盡倚筇獨立更多時

寄吏部張尚書

復喜清朝用大賢玉音俄對廣庭宣
姚崇已託君臣契李泌終操將相權
此日經綸須展布他時簡冊要流傳
淵明有待公田米可念江湖久棄捐

題謝疊山遺墨

荆南失守見亡形太歲徒聞忌丙丁
羸老扣心天藐藐鬼神號哭夜冥冥
忠臣效死招烏合烈婦捐生報雉經

辭氣凜然遺墨在再三尋繹淚雙零

寄題成都萬竹軒爲李仲淵作

君家種竹蜀江旁高與蠶崖勢頽頽已樹旌旗分部曲
更鳴琴瑟應宮商蛟龍併逐波濤化虎豹曾因霧雨藏
兄弟至今俱宦達未應開徑接求羊

送范德機

往歲從君直禁林相於道義最情深有愁併許詩頻和
已醉寧辭酒屢斟漏下秋宵何杳杳窗開晴晝自陰陰

當時話別雖怱遽祇使離憂攪客心

雷江阻風寄池陽通守周南翁

繫舟江岸隱蒲蘆坐聽篙師制疾徐
巨浪駕空龍出沒猛風吹樹鳥譁呼
詩題短札難頻寄酒滿長筵已屢沽
輦道沙乾宜竝馬問君何日宦京都

點義倉卽事

南來受命佐爲州喜遇豐年暫出遊
過嶺崎嶇尋道路上山磽确治田疇
修藤挂樹龍蛇走怪石攢溪鴈鶩浮

賦役已寬詞訴簡素餐無補謾優悠

再次韻張秋泉真人碧桃

一枝如玉照芳春幾度憑闌欲殢人翠被夜寒愁灑淚
珠簾月冷怕傷神劉郎陌上栽仍舊王母池邊賞又新
不是梨花飄雪樹望中清絕更無倫

寓長春道院春雨即事呈鄭尊師二首

南榮相距數尋間滿地春泥隔往還夜雨暗添籬腳水
曉雲濃掩樹頭山修篁夾逕宜增植細草侵堦莫謾刪

世慮紛然無止極敢求大藥駐衰顏

客遊無賴阻重陰院落蕭條逕衍溪數畝林塘觀不厭
一窗風雨坐相侵靈虯尚有蟠泥迹老驥寧無越塊心
多謝西家賢太守相招樂飲費千金

題沈君湖山春曉圖詩卷

迤邐沙隄接畫橋東風楊柳暗長條鶯隨玉笛聲偏巧
馬受金羈氣益驕舞榭歌臺臨道路佛宮仙館入雲霄
西湖春色年年好底事詩翁歎寂寥

舟次池陽偕通守周南翁燕表姪陳和卿家席
上贈歌者

故人相見話綢繆三日江干繫客舟
高燕未闌明月上
艷歌初轉彩雲留
光搖崖蠟寧知夜
字寫邊鴻已報秋
底事尊前能盡醉
為伊肯展翠眉愁

贈惠山聖長老

道人卓錫向名山路絕巖頭未易攀
海上潮來風浩浩
洞中雲出雨潺潺
松栢直起參天碧
苔蘚旁行匝地斑

藉甚後人蒙法施有如流水注蒼灣

贈孫思順

天涯相遇兩相知對榻清談玉屑霏芳草謾隨愁共長
青春不與客同歸薰風池館蛙聲老落日簾櫳燕子飛

南浦他年重到日湖山應識謝玄暉

此詩風雅作趙子昂體要作楊仲弘

寄曹雲西

羨君卜宅遠紛龐長把絲綸釣大江秔稻色枯雲慘慘
芰荷聲急雨淙淙消磨歲月書千卷傲睨乾坤酒一缸

甫里當年遺帙在交鋒那有豎幡降

送戴尊師入越

躍馬年年塞北遊春風此日送歸舟
山中樹老飛玄鶴江上莎長卧白鷗
欲與謝公同隱逸肯容賀老獨風流
山陰道士如相見沽取邛醪醉未休

此詩元音體要俱誤作趙孟頫松雪

集中
不載

賦飛鴻送胡則大

年年客裏見飛鴻成陣成行上碧空
杳杳江湖尋故侶

蕭蕭蘆葦下新叢
翱翔已出雲霄上
飲啄寧來沼沚中
今日似君歸去好
扁舟一夜起東風

次韻蕭君用

崔嵬出水翠雲浮
舁轎拖舟豈厭遊
澶漫渠河方涉夏
蕭條竹樹已迎秋
銜杯興盡人先醉
舞劍歌長客易愁
八月江湖翻渤海
長竿更約與君投

遣興

庭樹號蟬日已涼
寒雲橫鴈夜何長
挾書萬里干明主

仗劍三年別故鄉
西北諸山連朔漠
東南衆水隔荆揚
淹留不去慚蘇子
莫遣貂裘厭雪霜

湖上

秋郊縱步却驂驪
勝事能多許客參
如雪萬家收早稻
未霜千樹著黃柑
鼉鳴海上潮先湧
猿叫山前霧欲含
放浪漁樵元有處
使人猶愛住江南

偕汪侯宴舟中

中流畫鷁獨翱翔
暫勒鳴騶駐岸旁
風引錦帆衝野色

波隨蘭棹泛晴光
草涵宿潤珠璣滑
麥漲春雲餅餌香
何事乘槎之海上
問津從此達天潢

莫春遊西湖北山

愁耳偏工著雨聲
好懷長恐負山行
未辭花事駸駸盛
正喜湖光淡淡晴
倦憩客猶勤訪寺
幽棲吾欲厭歸城
綠疇桑麥盤櫻筍
因憶離家恰歲更

題胡伯衡飛雲圖

未應時命固相違
千里遨遊久不歸
已占龍頭承紫詔

更斬馬首賜朱衣塵沙客路牽愁遠泉石家鄉入夢稀
日夜思親心更切滄浪悵望白雲飛

吳山晚眺

山椒翬構四垂寬上相旌旗會覽觀旁近江湖天廣大
上連星斗地清寒龍宮永鎖函書閱鳳嶺重嗟苑樹殘
此際獨無雲蔽日正宜翹首望長安

遣興

門前高柳綠紛紛戀靄留煙晝不分雨砌芳菲晴後見

風窗言語靜中聞
桐花可作鳳凰食
竹葉還成虎豹文
但使此心無外慕
卜居何用絕人羣

夏夜對月

暑天煩倦唯酣寢
薄莫登樓起宿痾
簟報新秋涼意早
窗開永夜月明多
不眠孤鶴頻驚叫
好事流鶯屢見過
安得泛舟江海上
坐觀冰鏡落滄波

題高尚書竹石

矯龍疑蒼筠
踞虎肖白石
儻乘風雲會
變化那可測

題墨竹爲鄭尊師

風味既澹泊顏色不妖媚孤生崖谷間有此凌雲氣

客中即事四首

漸覺星星兩鬢皤推愁不去奈愁何客中忘却春光度
驚見前林嫩竹多

終朝兀兀坐書帷春去春來總不知怪得山禽如有意
隔窗撩亂踏花枝

幾日懸懸雨不休客窗孤迥使人愁杜鵑啼切知何處

坐對雲山萬木稠

美木千章繞故宮如煙如霧塞虛空
路衝南北山岡斷披拂能來萬里風

悼鄰妓二首

西子湖邊楊柳花隨風飄泊到天涯
青春遇著歸來燕

銜入當年王謝家

此一首體要作揭傒斯誤

一種腰肢分外妍雙眉畫作月娟娟
春風吹破襄王夢

行雨行雲若箇邊

二詩鐵崖採入西湖竹枝詞序云我朝詞人能變宋季之陋者稱仲弘為

首而范
虞次之

沙鴈

漠漠寒煙樹影微
一行沙鴈背人飛
江南江北秋將盡
客子如今猶未歸

扇上竹

種竹何須種萬竿
一枝分影亦檀欒
秋宵更受風披拂
聽取清聲入夢寒

次韻康子山舍人二首

兼旬風雨氣寒涼
院落幽深草木長
却喜今年多夏果
碧苞丹實滿林香

欲賞秋花色已涼
碧雲散盡楚天長
姮娥舊種無多樹
何故人間有此香

到京師

城雪初消薺菜生
角門深巷少人行
柳梢聽得黃鸝語
此是春來第一聲

送人二首

客路逢春雪乍消眼前愁思轉相撩垂楊染作黃金色
舞徧東風萬萬條

金溝河上始通流海子橋邊繫客舟却到江南春水漲
拍天波浪泛輕鷗

畫竹石

林前怪石起參差篁竹叢深使客疑如過瀟湘江上路
鷓鴣啼罷日西時

宿浚儀公湖亭三首

夜宿湖亭水氣涼四更風露溼衣裳空濛霧重前山暗
屋角斜明是月光

兩兩三三白鳥飛背人斜去落漁磯雨餘不遣濃雲散
猶向前山擁翠微

幾年鄉夢隔江湖此日登臨興不孤小艇欲行無遠近
不愁歸醉要人扶

題十二紅卷子

碧桃枝上有珍禽調舌交交聽好音畫出江南春意思

明年携酒共追尋

喜晴

樓外斜陽放晚晴
街衢前後聽歡聲
迴舟更倚南風順
千里青山照眼明

紀夢二首

四面青山擁翠微
樓臺相向闢天扉
夜闌每作遊仙夢
月滿瓊田萬鶴飛

紛紛鸞鶴滿虛空
耳畔如聞度海風
直上雲霄千萬里

此身飛入紫微宮

用韻送德陽入越爲贅壻

輕霞薄霧詰朝晴
岸柳江梅著樹明
更向若耶溪上聽
旁人歌唱盡春聲

次韻雪

研光帽子舞山花
吹落曾城萬仞斜
安得飈輪爲我駕
一時飛到列仙家

陽關圖


咸陽西距玉門關萬里征人憚往還此別尊前須盡醉
相逢俱是鬢毛斑

喜晴

檐外喧喧雀報晴夕陽猶照小窗明迴舟更倚南風順
要聽田家打麥聲

元詩選初集卷二十七

謹案第二十五頁後六行鄂勒哲依圖舊作完者
都今改後倣此 四十三頁前六行和碩布哈
舊作火涉不花今改



總校官候補中書臣吳紹潔

校對官編修臣馬啟泰

謄錄監生臣姜也魯

欽定四庫全書薈要

集部

元詩選初集卷二十八

詳校官候選知縣臣吳甸華



欽定四庫全書薈要卷二萬三百八十八

集部

元詩選初集卷二十八

長洲

顧嗣立

編

范梈德機集上



梈字亨父一字德機臨江清江人家貧早孤刻苦
爲文章人罕知者年三十六辭家北遊賣卜燕市
薦爲左衛敎授遷翰林院編修官出爲嶺海廉訪
司照磨歷轉江西湖東選充翰林應奉改閩海道
知事移疾歸徙家新喻百丈山天厯二年授湖南

嶺北廉訪經歷親老不赴其明年以母喪哀毀卒
年五十九德機癯然清寒若不勝衣而持身廉正
爲文雄健追慕先漢古詩尤好爲歌行工近體藹
然見忠臣孝子之情焉吳文正嘗以東漢諸君子
擬之人稱文白先生所著有燕然藁東方藁海康
藁豫章藁侯官藁江夏藁百丈藁總十二卷揭曼
碩序之以爲虞伯生稱德機如唐臨晉帖則終未
逼真改評之曰范德機詩如秋空行雲晴雷捲雨

縱橫變化出入無朕又如空山道者辟穀學仙瘦
骨峻嶒神氣自若又如豪鷹掠野獨鶴叫羣四顧
無人一碧萬里差可彷彿耳德機詩學廬陵楊中
伯允得其骨郡人傳若金與礪得其神皆有盛名
於時歐陽原功曰宋東都時黃太史號江西詩派
南渡後楊廷秀好爲新體宋末劉會孟出於廬陵
而詩又一變我元延祐以來彌文日盛京師諸名
公一去宋金季世之弊而趨於雅正於是西江之

士亦各棄其舊習焉蓋以德機與曼碩爲之倡也

送張鍊師歸武當山

張君瀛洲人來作武當客始來武當時祇著謝公屐弟子百數輩稍稍來服役誅茅立萬柱空中現金碧辛苦三十年夜卧不側席以之律鬼神故亦如短墨元年踰冬旱失火燒四國野谷方焦燉六月幾旬赤朝廷亦不愛犧牲與圭璧僵巫暨僊史歌舞無消息君時待詔來公卿初不識一朝傳天語問以濟旱策君云臣鄙愚造

化非所測陰陽有開閉此實智者責公卿復致辭物生
今孔棘已勅京兆尹取足輸粟帛此如解倒懸祀事惟
所擇君聞猶固讓心實內憂惕飛章白玉闕瀝膽殫悃
幅臣實才淺劣臣實學迂塞臣有一寸心願輔后皇德
后皇本愛民民今旱爲厄或者罪有由皇亦重開釋祈
謝各有方呪禁各有式上堂薦明水下堂考金石夜分
請命既昧爽大施設爲壇東市門經紀法靈冊庭中玄
武旗飄飄墨黍一作水黑君臨一揮手怒髮上霄直指麾

東方龍卷水東海側指麾西方龍卷水略西極北南暨中央各以方率職某日某甲子漏下五十刻我在壇上伺不得忤區畫豐隆與飛廉列缺與辟歷汝將汝風馳汝遣汝雷擊汝雲馮勿漓汝雨必三尺汝不從誓言不畏上帝勅至期果響答動盪七日澤常時人所難君若不以力公卿奏天子是必有褒錫可以寵號名可以蕃服楊君曰天子聖卿從誠所格臣敢貪天功況乃歸計迫昨得山中書至自青溪宅向來百弟子遲歸在朝夕

暇時冬序半霜下木葉積明當課斬伐結構西巖壁山
田晚報熟芝朮及採摘獼猿長如人夜夜盜柿栗隄防
苟不豫六氣盡蝨賊公家事既已私事容棄擲方知用
世士遺世等糠粃所過如虛空焉知去畱迹我持一瓢
酒欲以贈遠色歲莫不見君悵望空中翮

奉同元學士以落月滿屋梁猶疑照顏色爲韻
賦贈鄧提舉之官江浙一首

青天青如石星辰何磊落適見北斗高忽復滯郊郭感

此流電驚行邁孰爲樂況值杪秋令清商動涼幕芳燕
候朋親驅車背河朔登高望四野下田畧新穫於時不
同賞惆悵睇雲岳古人有云然末契重交託託契自有
初相睇在結髮請持交龍鏡比似空際月昔月三五盈
今夜三五缺月盈自有時俟君采薇蕨采薇陟崇岡空
筐不易滿季女懷朝飢日下光纂纂豈無機杼思十旬
義一澣含悽就經緯意長絲緒短路逢相識親要入鮫
人館泣下仍成珠更苦哀歌緩緩歌浮雲停急歌流水

促水流亦有宗雲散復成族踽踽行路子離居振羣肅
會合寧無期載感時運速晨風懷苑林元鳥辭華屋明
發念飛蓬秋聲浙江曲浙河名山水在昔最餘杭浩浩
負海區地絕川無梁執玉夸禹會帶甲宣吳疆慨彼仁
義都風俗殊興亡末代綴繁會周衢沸絲簧聞之虛廟
閔斷雨生蛩蛩幸及九域一四民一作海樂時康游歷須
慎重勿用多殞傷矧茲握新命出布堯文章雖當日月
遠足昭雲漢光淒其金氣厲嘉寶方斂藏楊柳卧枉浦

兼葭委嚴霜物情各有歸我獨不得將仰視雲中鴈肅
肅俱南翔雲鴈明天中回首顧齊州沙嶼重綿互竟復
少遲畱欲知鳴鴈心黍稻非終謀視彼羣飛者矢心良
不猶不猶將謂何豈復不如茲明年擇聖蹈既往無復
疑譬之駢蹄駒昂藏養雲姿下乘歲百駕逸足誠歸誰
伯樂偶竝世當受知者知長鳴待儔侶首路復安之所
之在東南斷水列風橋至人遺吏隱出處惠兼妙于莫
居匣中千年逸神耀一朝持入手未言心相照照之千

里外如在咫尺間
明夜夢見君
怡怡越河關
惜去不須
史念來亦循環
古時歧路人
何用涕潛潛
景巖草木斷
虎豹啼空山
方冰先春水
野飯維清灣
買觴斲魚鮮
甫謝金鸞班
此行竟遂媾
亦慰親友顏
天目掃煙岫
日夕飛禽還
山中桂樹多
庶爲故人攀
攀花貽遠道
洵美道中
輒若復無相
忘報之雙白
璧美人如芙
蓉隔浦無相
識舊交日已
違新交當日
得各自有殷
勤初不在容
色俯水愧遊
鱗仰空慚飛
翼眷言執手
地歲莫霜霰
迫跼

踟復踟悽惻重悽惻

貽富珠哩卿編脩

悲風動日夜遊子絕河山一別十年流四方幾時還憶
子旅江外過余撫林麓曉色竹晻靄春容杏闌珊陽坡
鳴赤雞陰館來白鵬文義相剖析宴歌亦循環吳星逐
夢變楚月帶愁彎自來燕薊中相望漢沔間初傳教下
郡或道釣清灣起居雖未悉聲聞已難攀明聖御八極
震驚折羣姦登賢彌制斷進士嚴刊刪倒澤起游泳搜

空集翻翽斯時麟見郊絕世驥在閑豈期脫布衣復得
聯朝班始疑迹異方卒見意俱閒惟此冰雪壺近當雲
霧關紀載竹帛藏潤色絲綸頒儲才藏地閤抽思剖天
慳固當讓俊逸焉得委疎頑物化豈堪玩仙栖庶可扳
寤寐在靈嶽徬徨愧塵寰碧草蒙澗吐青霞冠雲鬢長
生願不負竟徃事無艱常聞羽人言頗落俗士顏早伐
九節杖倚之聽潺湲

蒙恩供奉翰林未行改佐閩幕自豐城便道取

疾絲撫過盱與郡守薩侯會約尋麻源不果明

日別盱

暫遠雲霞觀却希山水音珠星聯極下璧月動江潯始
集寶氣亭復趨金晶岑馬飲樹連澗猿啼風滿林揚瀾
思汗漫睇嶺寫嶽峯輟櫂更垂釣推書時弄琴石門生
夕景麻源籠曉陰是郡遇賢守佳致契幽尋樽俎迫清
好絃歌彰古心郡中宜鳳集泓下或龍吟頗愧塵務逼
還爲旅病侵一行混吏軌千載負國琛卽往事莫究於

茲念方深姑山如有意遂許一登臨

由海昏入武寧道中

登高勢欲墜踰險心始領戒想適其恒經過何由騁洩
雲行掩杉零露浥澗茗元蟬振山淒白鷺團沙整久盼
歸舟近况懷垂釣永豈不畏嚴程無因攬流景煙霞蘊
至樂歲月啟溪省百丈有幽期眷茲心耿耿

九日報熊敬輿

羸疾卧江滸承恩慰高秋木落鵑階淨天朗氣暄柔便

了晨光中授我雙螭蟬呼童敬薦之風味宜南州憶昔
客燕薊白雲從方舟於時見此物十錢三十頭打黃試
新羹爛醉天市樓一日食一百更爲明旦謀三日困暴
下傳笑諸公侯此邦誠罕見初出一作市愈難求矧當浮
萸日傾道俗如流厚價得兩螯持之比琳球物有少爲貴
感事重綢繆奈何雷同者政復多優游欲折黃金花報
君向滄洲此花苦未發少待歲寒酬

贈安西王提舉別

車聲何軋軋去我亦翩翩借問車中人幾時到秦川秦
疆數千里西與雲棧連行人秣馬過猿啼上青天長安
古帝州宅土腴不偏聞君答平昔宦遊祇晏眠十齡涉
文史十五懷家氊二十學壯游五十綴朝聯奉常老掌
故今已二十年功業晚何就蕭蕭髮垂肩天子念逢掖
錫官頗靜便紫衣綰黑綬此是車中緣飄飄上都門白
馬錦連乾舉案招青山孟光老猶賢大兒坐車軒小兒
調馬鞭中兒又絕好國語荷珠圓旦夕俟君至買舍清

渭孺此皆足慰意日食官俸錢俸錢足養親親自有主
田人生慕富貴富貴翻受憐不有鍾鼎食亦無膏火煎
前日三市事目擊心凜然當時氣凌人不得呵烏鳶觀
君浩蕩去萬事當棄捐孔子不西行及河軌再旋今君
涉河流西路方縣縣終南與嵩華是中多神仙仙掌出
浮雲上有三峰蓮真人玉拄杖挂在明月弦便當徃從
之吸月升太玄金鼎交龍虎使我神貌堅奈何二三月
百憂集離筵空花如錦機野色相交鮮楊花亂愁思萬

條散青煙我不酌美酒敬讓故人先
搥碎琥珀盃獨灑
春風前春風澹無言徒以別慮牽別亦無所慮所慮應
當宣願及相思時中腸鬱糾纏爲吹雙紫燕銜書到君
邊矯矯蕭徵君珠貝藏龍淵一別如列星隨天夜移躔
鳳有五色瑞時下岐山巔請君問起居歸來定何年

宿夏莊

陰晴知何如開戶月滿地主家種長榆竟夕薰風至半
生朝市蹤頗負山林意及茲登覽餘亦復纏世累疎籬

臨大道嘶馬駭童稚衆卧復離披躊躇獨無寐江山轉
寥落星斗亦聯綴丈夫十載間豈獨鉛槧事

贈方永叔往敘重慶路

汲水得明月倒影上青天客行三十年未識蜀月圓中
宵夢巴蜀秣馬辭燕服成都雖云遠未到意已足遠意
不可期宿夕宛見之雲迷飛鳥道雨急卧龍祠干戈何
草草祇說渝州好但得渝州官甘就渝州老渝州古雄
城彭君舊建旌至今江石上猶有古時名豪傑世已矣

空城俯流水復有江東人來教渝州士方侯天機深大
雅託遺音沈潛萬夫敵脫略五湖心翩然別我往長揖
仙人掌疾風吹大旗落日明斜舫即此少相知相知長
恨思巫山桂樹發折寄定何時

送吳真人持詔寧親

垂楊十二門旦旦羅鳴騶千騎萬騎中孰是違世儔美
哉吳夫子脫灑住丹丘氣涵羣象動思與萬物周天馬
出名駒逸態橫九州自從下地走但飲星河流明月落

中江倒影射斗牛飄然持玉節去犯蒼山稠紫鳳把細
華逶迤仙巖陬遂經三茅岑已登閣峰頭還家拜封君
玉冊珊瑚鉤笑問游子衣不獨五色優門縣朱雀旂坐
擁金明裘開筵浥芳醴魚觴進庶羞承顏開淑訓慰爾
道路修爾歸奉天子萬歲更千秋番君大國壽賀老清
湖愁煙水三萬頃宮袍在扁舟荷花合古渡此處不夷
猶雲錦雙鴛鴦悠悠戲汀洲東風長年來揚我闌檻幽
白馬絡金羈奈此甚盛休儂家閣峰下霞竹敷稻疇鶴

集偃松雪青雲互綢繆自從干戈餘川岳秋蕭騷骨肉
倚四海風雲擾吟謳聞君復此去浩蕩懷今遊罷酒黃
鸝鳴高花艷城樓良辰難能別嘉會易爲酬至樂夫子
行子行無滯畱

散步還南軒

幸自塵鞅絕起游欲何之江遠夕氣澄開軒納新詩莎
雞振陽砌蠨蛸結陰池珊瑚修木靜宛宛好風遲

一作馳

桃杏競秋園旋隨時草姜寧不悅生植肅殺乃其宜于

斯見發育及溪霜露思嵇康本達節竟受薄俗嗤悞哉
東方生嘲哈得吾師

度澤過關山

單車度大澤有似游梁山初飛鴈驚徒辱在葭葦間季
冬陰風盛雨霰紛珊珊念我離大府行役何時還朝臨
昌邑浦夕指番易灣衝泥赴農邨老屋夜不關然薪設
供帳風味猶百蠻蒸烘溼衣裳徒御相迴環極知道路
難猶念奔走難傳餐逮明燭飢渴未容慳春和理稅駕

且以慰衰顏

古干將

叟叟古干將經世不再見豐城匣已空龍亦久當變百
怪日夜出思爾一斷剗裝佩美紛紛不爾真百鍊又恐
百怪飛翻著他人身麒麟或失所魍魎氣益神不如且
深藏慎勿干星辰我歌干將行庶爲君子陳

和答楊茂才

始我南山居與子共朝夕服事子尊君德義藹夙昔焉

知二十載萬變如頃刻
漁釣負平生浩蕩隨所適
進慚負官義退愧尋幽迹
而此山水間時勤問消息
夜深歎巖扃蘿月在屋翼
清言溢前聞子學日有力
世好將未忘相資庶有得

二杏

甲寅

北鄰杏一株身作龍盤拏
直上青天中虛空高結花
南鄰杏更好枝幹相交加
三月二月時市地堆紅霞
自我來京城寄居諸公家
其地僻且阻茂樹繞窗紗
亦有桃

與李盛節爭豪奢雖富無可人紛紛亂如麻晚遇此二
杏突兀超塵沙嘗時好客來立旆遙咨嗟欲去復顧戀
徃徃至日斜我昔直詞館羸馬道路賒晨徃昏黑歸無
由領其嘉今我已投散終日猶枯查朝莫出見之百市
虛簷牙而我又將去何繇報繁葩誓將適南郡辟地江
之涯種此一萬樹漫漫被荒遐花成實給食收拾歲盈
車此事亦易集但恐君疑誇

谷口散暑

谷口月未上漁火出橫塘門前面稻畦鼃黽雜風篁童
仆弄山墅今茲白髮長新歸稍結構日俟江海涼琴書
散衡宇藥物布滿牀謝告未緣衰以疾不得將維時仲
夏半織女當西堂常恐梧樹落莎雞戒衣裳平生荷耒
志經歲失豐穰此行庶無負海內膺時康

登石城驛亭

南游未是謫北行不當歸今旦陟崇岡飄飄風吹衣始
我在京時雙闕凝秋暉別來守窮海故國音書稀竊祿

滋愧負何時覩柴扉胡不依白日去即能如飛驛樓俯
平川其下白雲圍雨餘足稻梁可以信豐饑去去道路
遠王事毋稽違

饒國吳氏晚香堂

大江秋似練楚樹落清曉巖際不逢人翩翩數歸鳥饒
君庭宇靜澗水黃花繞爛錦照天朗繁錢承露小何當
鵝鳴鳴誤識春事了焉知歲寒姿獨立西風表乾坤有
清氣欲少未易少搖落莫春期美人煙霧香

將赴江淞大府校進士試會疾止建安驛上後
山東眺郡城作十二韻

青雲建安郡人物故鍾秀承旭開芳樹凌虛列遙岫溪
聲涌夜長石角吐秋瘦漁沙府圖識仙室川漫溜征塵
汨炎毒服事彌奔奏淡淡鴻鵠舉蒼蒼鷹隼候山英茗
在瀾館飯菰登豆勤渠相國誼忝竊大夫後顧惟論賢
能奚取推寡陋吾欲勅五丁雷電激宇宙疾飛移萬壑
及此洗昏疚起為梅子真南厓掃丹白

八月十五日公堂讌別作

悠悠我行邁去此粵山端遲明駐征車爰盡公堂歡開
筵俯城郭簫鼓集儀鸞謂欲戒醉飲重此良晨難關門
集會府僚友竝征鞍更辭無別語但祝長加餐役者四
五人相從出林巒亦復路傍泣豈獨殊肺肝况我離慈
母朝莫偵平安送行各如許焉得不辛酸

秋日海康齋居

吟事久已落茲晨遇高秋泠泠空中籟襲我書帷幽如

何寒暑疾徑與大江流江流不復轉歲月已還周遊子
去京華邈在天盡頭北鴈不踰嶺眷眷非良謀排雲挹
飛觀金爵露光浮在遠心所仰胡爲滯滄洲茅屋足花
草洵美難久畱苟能一吾志斯道將何憂

曉出西郊

自春已及夏歲籥寢中更平坦西郊道始聞啼鳥聲川
晴樹氣嘉夕露枝條盈西峰近在眼白雲夾路生一從
違夙昔好懷鬱難并未知高世意忽復何以營屠狗與

漁釣俱足成大名卓哉箕潁客使我抱溪誠

登西山頂還方澗作

弱質有貞向依依在物表謬當城闕隘放意窮昏曉晨
興理良轡啟途慮已悄白日滿澗阿林虛答鳴鳥幽尋
晚適遇頗覺知者擾俛仰古人迹達生未為少緬彼高
翔禽凌空自騫矯

秋江釣月

秋江明似鏡月色靜更好之子罷琴來蘿徑初尚早衆

卷二十八
峰更滅沒橫笛隔幽島我船爾棹歌絲綸蕩浮藻潛魚
却寒餌宿鴈起夜縞離離不可招白露下煙草高風桐
廬士俊業渭川老同是釣魚人那應不同道把酒酌清
輝如何答穹昊

郡中即事十二韻

儋耳九州外邈然在南荒周回數千里大海以為疆古
來非人居禽獸相伏藏自從中世來貢賦登明堂其或
失撫馭山藪更陸梁聚則成蜂螳散即驅牛羊高結舞

大鹵上衣不備裳殺戮乃酬勸誅之仁者傷吾嘗七八
月持節泛滄浪一旬錄郡獄詢事考纖芒問之守郡人
莫識爲治方但見西風多靡宇秋蕪長聖哲戒忠信勿
謂不足行及茲蠻貊邦始見斯道臧

清江楊鵬云文白先生詩性情所宗

一以少陵爲歸海外諸作杜之悲壯也

出甘蔗州

清雨氣候變移船孤石灘已行千里餘始驗初冬寒暫
解霧露毒稍知江山寬新人異言語故事同憂歡思昔

夏后氏封建天南端伯業起句踐世遠子孫殫無諸佐
大業遂作漢王官身受閩君策白日海澄瀾至今崇臺
上列戟絢衣冠古來樹名節於此事常難惟有精英在
青霄明羽翰

晚登南樓眺烏石九仙方山諸峰

自來閩中郡僑寓公宇偏身病縻服餌單居日如年憲
署歷三試愚庸寡所宣茲行臨辟道黽勉以周旋日夕
登高臺遙盼四山川山川亦云美宜與萬念捐慈闈隔

江關穉子目娟娟連夜夢新堂嬉戲在我前祿食無寸
補遠遊何當還東風號陰澤此土候氣先草木相裛榮
已復爭碧鮮思及方春時買船向邵延長歌蕩暄景吹
笛玉臺煙行止欽聖訓義著良象篇此豈不在人虛心
以勉旃

四月八日訪閩粵王無諸古城遂至蓮花峰下
僧寺寺乃唐王審知祠

維夏氣清宴原藪樹龍蔥上弦適休暇游詠紫煙中石

澗演新流山苗含惠風肥芋膚隱白崇摺葉張紅撫節
警代謝未歸憂心忡承官數政術但覺祿養豐句稽困
日月始得如游驄觀省職何補庶望裨至公遺丘隱莎
草廢剝在空濛而况塵境事斯理固有終

數日毒熱喜雨適立秋先三日也

夏末始炎毒沈憂坐匡牀起行無所之登高睇遐荒問
昔西風歸颿颿向何方往還不可期賴得天道常聖主
御大歷故可稽明堂粲粲白駱駝茲晨郊路長念我伏

遷次江海葉再黃旅懷抱焦火思濯寒冰鄉忽來浮蒼
雨爽氣吹衣裳稻田已就穫晚種待新秧微軀亦易持
但願蒸黎康

新雨階除花藥倍茂田里生意懷之欣然情至
有述簡諸友

久旱埃霧集閑居寡高情微雨夜來至滿庭花藥生長
年憂里術退坐若無營偶攜一榼酒得喚故人傾念彼
忙隸便勞生在耦耕薦饑苟不熟何以供王程幸天沛

時澤食息日已寧
繕性衡門下寒飢無足驚

苦熱懷楚下

苦熱不可極念此西南風誰云灝氣遠乃在庭戶中我
家百丈下井上雙梧桐向夕集歸鳥未秋足鳴蛩自從
別家來江海信不通宛宛維桑思願從孤征鴻夜夢白
髮親歡笑攜稚童倚門望子歸未歸憂忡忡東皋無良
田何以待歲豐盛年將稱意無為學轉蓬

明月幾回滿

明月幾回滿待君君未歸中庭步芳草蝴蝶上人衣誰
念同袍者閑居與願違

蒼山感秋

蒼山秋意長池館靜而閤雨止修竹間流螢夜深至皇
羲世云遠雅頌日凋弊舉手過頽波誰識作者志烏啼
魯東門泗水不染袂後去三十年直可肩聖知機關繫
風化詞語特細事月落閉虛簾坐夢太古帝揚眉頽玉
色盡發養生祕勿謂仙學一作學仙難此道可立致葉世奇草木子

云音危太朴與德機同脫步德機得雨
止二句喜甚既而曰語太幽殆類鬼作

酬申屠子迪

碧月出海底挂在青天中美人如明珠滄波思無窮身
非千歲蓬欲逐萬里風願因紈素衣託向孤征鴻

筠州東都遇雨

高林展夏綠杲日轉城岡四國金石流忽見飛雨涼飄
飄西北風亦復至我傍我行初涉旬去意已徬徨親交
苦滯畱川陸互一作阻長遠行雖有命期至詎能忘宵

分睇南星命僕戒川航豈無他方願且及顧舊鄉舊鄉
寧非懷吾生未渠央

秋江

秋生洲渚靜露下蒲荷晚忽憶釣魚時人家楚鄉遠

絕句三首

障擁芙蓉競燈隨櫓桺移繁星臨迴野疎雨過高池
江上打魚船有頭那無尾與卿相見時不望如魚水
鄉路西州是延平那向東片帆儂會使祇是怕隨風

看東亭新筍

問竹何年有親曾共歲寒昨傳新筍發扶杖繞林看

蘄州城下晚泊與土人語及西方事平有喜而

作

野闊秋無際天空夕始涼漁船下浦急畚火入雲長洲
遠懷鸚鵡山危指鳳凰戍人新斂甲垂老幸時康

黃州道中

徑轉山仍掩沙移圃自成簾葭連水白楊柳蔭門清無

復論餘事真堪了此生眼中陳仲子九鼎一豪輕

百丈山中夜坐聞謹思將還憶甲寅入南中正
此日也十二月二十三日四首

近得雷州信遙聞弟姪來江山淹遠望天地保疏材鄉

爲魚羹起今寧馬豆猜殘年有心事未定著一作省定寒灰

欲雪翻成雨何天恰吝情似緣春在近故與月爭明谷
樹行行暝川雲冉冉輕往年當此夕孤棹適南征

斜谷驚風合空階墜溜鳴燈昏時作暈漏遠不傳更但

得林間趣何須谷口名是誰超物外不用計浮生
客行身萬里家在地中分爵命優臣子江湖遠聖君夜
瞻龍鳳氣歲出虎狼羣舊故無消息低回瘴海雲

壬戌秋錄囚晚行寧州道中追錄

曉發高平鎮前旌路未分小橋煙外過流水月中聞虎
豹宜多隱豺狼不可羣居人敵炎暑報有竹連雲

引兒灣晚泊

席壓波心正舟移岸脚斜夕陽明細霧秋樹擁荒葭問

道獨如夢懷京邇勝家客愁不自整更苦暮啼鴉

九日諸生攜酒至城東看菊

楚楚臨階菊重陽特地開慰人良有意報汝媿無才
巷杵聞雞發鄰觴送蟹來采英吾欲寄悵望倚江臺

晚過孔奉常舍下

滄江一萬里書信近如何向莫客懷薄及秋鄉夢多
故人相慰藉竝舍數經過但願長無事彤庭接珮珂

贈別李教授亭赴五年先往餘饒觀省

行色動西風鄉心去住同諸生五嶺外之子大江東且
羨還家鶴無愁度海鴻若逢天上使書記莫怱怱

王繼學晚過舍下翌日惠詩兩章用韻荅賦

錄一

平生病太史淺陋愧曹邦自足封函谷聊須壘受降黃
鐘知和寡白璧動成雙天外誰招得清風滿八窗

和二章已而徵者適至戲用韻爲再疊云

久客歲云莫悠悠念異邦病因詩暫愈愁爲酒先降屋
隱疎簾半城依老樹雙晨朝有好鳥命我隔東窗

登南城樓

樓倚晴空外登臨延賞心
微風孤鴈過落日萬蟬吟
客路侵齊樹鄉愁接楚砧
爲詢宮外筑流水似哀琴

寒食後百丈山夜坐

已新寒食火更近莫天鐘
花片隨風減柴扉帶月重
以閑酬宦達將病抵心慵
本不從耕稼臨江愧老農

懷閣延望

懷閣延江望清尊息坐彈
風雞猶戒曙雲鴈每辭寒
莫

使晨歌廢聊思飽食安百年會有故終不愧儒冠

題秋山圖

我愛秋景好自緣秋氣清江空石露骨木落風無聲偶
向畫中見猶如雲外行祗疑豺與虎無地得縱橫

貴州

離思久不愜幽情晚旋添天宜明月獨山與宿雲兼蛩
語通支柱蛛絲映卷簾若無光霽在何以破朱炎

發橫浦之永淳縣

急漿開蜃漲孤尊已夕陽水光排峽靜洲勢背城長太
史才無敵將軍義不忘感傷今歲月淹泊媿滄浪

題吳生雨吟圖還寄清江皮野

江雨四時昏故人家遠邨如何一見面還又兩忘言老
樹經鮫淚空花斷鴈魂由來前日畫妙手出吳門

東齋秋雨後花藥具有生意

田園雖尚遠未肯效淒涼藥就籬成蔓花因徑作行豈
惟延晚趣自足信年芳頗敬鄰人婦驅雞不過牆

晚興

古寺山重掩平田縣對門
鷓鴣藏白晝蟋蟀破黃昏
貝賈多通市諸儉每近邨
殷勤省風俗慷慨動心魂

晚上南山觀燒

渡口向寥闌夕暉生翠屏
隨風初繞電翳霧忽如星
鳥獸蒸宜遁柴扉照不扃
閩都春始過雨洗合重青

京下思歸

黃落薊門秋飄飄在遠游
不眠聞戍鼓多病憶歸舟
甘

雨從昏過繁星達曙流鄉逢徐孺子萬口薄南州

期出東郊不果却率便河閘橋詣張道人菴尋
故舊作

却欲東郊去還尋北渚來江翻垂木動風過雜花迴
道迷朱轂虛空見紫臺世氛渾不奈憶得是蓬萊

和李溉之園居雜詠四首

書劒上青霄鄉關雨雪遙年華侵水竹客思墮山苗
會想商巖綺將從鄭里橋文詞誠小伎祗比俗情饒

豈是幽棲地飛騰亦未量城根分鼠壤池面合魚梁名
久喧郎署歌時感女桑畏卿音調苦疇復貴相忘

圃色依簾障天光切戶庭草生連夜雨花落徧池星未
遂翔寥廓真堪托晦冥逢時須紫燕得意拂青萍

丹柰花初結朱櫻子半成寢興因物變筋力與年增燕
拂承塵去蜂隨曳杖行玉泉幾千仞好在翠如傾

種瓠二首

或言種瓠蔓長必翦其標乃實予齋所種因

樹爲架蔓緣不已果多虛花欲去之慮傷其
凌霄之意因賦五言爲之解嘲云

豈是階庭物支離亦自奇已殊凡草蔓綴得好花枝帶
雨寧無實凌霄必有爲啾啾羣鳥雀從汝踏多時

秋後瓠果成一實輪囷可愛余嘉其晚成而
不羣答賦云

嘉瓠吾所愛孤高更可人不虛種植意終繫發生神有
葉誠藏用無容豈識真明年應見汝衆子亦輪囷

寄李彥謙御史

古燕城下路柳樹落西枝每到重來處長憐欲別時鶻
飛平照急鷗集遠煙遲此去秦州什應須寄我知

盧師東谷懷城中諸友

契闊遽如許淹留空復情天遙一鶴上山合百蟲鳴異
俗嗟何適冥棲得此生平居二三子今夜隔重城

離席合賦贈南劔教授盛復之之官

首路向朱夏出關猶到官麥收風漲暑梅熟雨留寒氣

候隨方異才名自古難
豈容賢若爾教授老江干

遣懷

柳影侵門暗桃枝亞竹高年深詩竝進春在酒爭豪吏
隱嗟何擇行藏信所遭斯文如未喪端合付吾曹

贈李提舉之官豫章

公孫閣下士多似魯諸生昨者聞高誼茲行起盛名文
亭南斗近征旆北風輕余亦懷鄉郡今猶滯帝城關河
驚半面雪霰念孤征芳宴絲簧咽新詩錦繡成長途心

果怯令節眼增明渺渺飢鷹度嗷嗷旅鵲鳴露凝秋浦
白雲散夕堂清是物關流動何階計合并會須縈挂楫
相共啜蓴羹徐孺亭前水因之幸寄聲

立春日和王翰林

北斗紅雲上西城皓雪邊歲華今若此宦味故依然節
輶荒冬後寒驅夾日先樓臺通帝極井落散人煙登眺
臨無際歡娛信有年客情關外地農事庾陰田只有傷
絃促那能效屐穿幾時歸櫟社盡日接芳筵寶鼎昇平

瑞金藩淡蕩妍逶迤朱鳳集瀟灑白鷗眠遠業嗟何就
高明賴必傳道雖沾世用意漫逐時遷顧遇煩頻數欣
榮頗倍干江湖萬里興爛熳百花前

寄福建杜廉訪使君

臬府羣工表言官百世公君王資稷卨臺閣起黃龍吳
越聯閩服蠻夸偃漢風九州諸道右一柱衆一作萬流中

虎豹精神肅豺狼道路通青冥行勁銳白日貫精忠斧
繡揚秋隼泉阿達夜蛩壺冰元自潔瘴雨不勞空賤子

嗟何幸微心誓盡躬望來方切切告別匪恩恩祇為文
科重尤慚祖餞隆客魂消海鵠病骨瘦溪蟲謬敢辭王
事私嘗泣老翁髮緣思母白顏每應人紅儻使彞倫薄
其如祿養豐以茲三徑撫猶獲二天蒙上幕刑雖簡滄
洲道未窮且將心萬疊寫入嶧陽桐

送菊

卧病高秋畱海浦明日重陽更風雨杜門不出長蒼苔
令我天涯心獨苦籬角黃花親手栽近節如何獨未開

含芳閨采亮有以使君昨莫徵詩來凌晨試遣霜根送
畚土雖微甚珍重極知無意競秋光往一作作橫窗歲
寒供憶我初客天子都西垣植此常干株結花年年應
吹帽始信南邦事盡殊願得封培自今日何間朱厓萬
家室秋香端不負乾坤但嗔簫管亂儔匹歸去來兮雖
得歸念歸政自莫輕違他日采英林下酌誰向清霜望
翠微

閩州歌

閩州土俗戶不分生子數歲學繡文圍網坐肆雜男女

誰問小年曾識君古來夜行斯秉燭今者衢路走紛紛

那更誅求使者急鞭箠一作筭一似雞羊羣古來閨閣佩

箴管今者女工徵六軍雖復太平少征戰設有備豫將

何云去年居作匠五千耗費府藏猶煙雲官胥掊克常

十八況以鳩斂奪耕耘祇今棄置半不用民勞竟是誰

歡欣歲歲條章省煩費幸且不省無方殷唐虞在上儉

且勤後王猶復錦繡焚豈有夔龍讓姚宋不言忍使憂

心熏觀風自是使者職作歌雖遠天應聞

閩俗文繡局取良家子爲

繡工無別尤甚亨父爲閩海道知事作歌一篇述其弊廉訪使以上聞皆罷遣之其弊遂革

擣練圖

深宮佳人白日長夜感蟋蟀鳴中房起視河漢心回皇
雲鬢籠鬆分作行清水如天收素練翠蛾帶月杵玄霜
輓轡無繩金井悄邊頭不見梧桐黃裁縫熨帖坐在牀
載玄載黃公子裳製成不遠煩寄將但見寒暑彫三光
身體甚適平時康君不見古來邊庭士雪壓關河征戰

多折盡衣裘淚如水

題李白郎官湖

當時郎官奉使出咸京
仙人千里來相迎
畫船吹笛弄綠水
何意芳洲遺舊名
唐祠蕪沒知何代
惟有東流水
長在黎侯獨起梁棟之材一作彷彿雲中昔軒蓋南飛越

鳥北飛鴻今古悠悠去住同
富貴何如一盃酒
愁來無地酌
西風大別山高幾千尺
隔城正與祠相值
青猿夜抱月光啼
挂在東湖之石壁
黎侯本在斗南家
枕戈猶

自憶煙霞祗擬將身報天子不負胸中書五車昨者相逢玉闕下別來幾日秋瀟灑黃葉當頭亂打人門前繫著青驄馬君今歸去釣晴湖我亦明年辭帝都若過湖邊定相見爲問仙人安穩無

王氏能遠樓

游莫羨天池鵬歸莫問遼東鶴人生萬事須自爲跬步江山即寥廓請君得酒勿少畱爲我痛酌王家能遠之高樓醉捧勾吳匣中劒斫斷千秋萬古愁滄溟朝旭射

燕旬桑枝正搭虛窗面崑崙池上碧桃花舞盡東風千
萬片千萬片落誰家願傾海水溢流霞寄謝尊前望鄉
客底須惆悵惜天涯

錢舜舉畫馬歌

錢君畫人勝畫馬安得名驄妙天下青雲隱約見龍紋
有意軒昂駛華夏園官山立頽而髯朱衣黑帶高帽尖
問渠掌握詎有此牽控寧知人女嫌君不見才士受束
縛往往因之縱寥廓

杏葉黃

杏葉黃天雨霜穹窿攜日照八荒回光照見白玉堂堂
中美人雙鳴璫中宵抱被直西廂忠君愛親兩不忘奈
何零露沾衣裳清曉樓頭見征鴈不如謝官歸故鄉

侏儒行

君不見東方朔長九尺餘不如侏儒長三尺朝捧一囊
錢夕竟飽死復何益死者不可作飢者食有餘堂堂之
軀天所命生之短者續則悲嗟哉世之人羨彼侏儒復

何爲

輓轡怨

門前水揚聲似雨幽人當窗碧絃語東里征夫去不歸
一雙蛾眉鏡中舞年年井上攀輓轡勞心只恐秋葵枯
他家種得長生草梅花落盡青青好

掘塚歌

昨日舊塚掘今朝新塚成塚前兩翁仲送舊還迎新舊
魂未出新魂入舊魂還對新魂泣舊魂丁寧語新魂好

地不用多子孫子孫縣縣如不絕曾孫不掘玄孫掘我
今掘矣良可悲不知君掘又何時

望瀛海一首送危太樸之四明兼簡廉訪鄧使

君翰林袁侍講

危君英妙年獨往志千載天馬出名駒空行見風采昨
日銜書到空谷甚欲留之不能待九月開帆指四明要
逐高秋望瀛海海上接天漫漫世人不知此別難當
君夷猶碧嶼日是我對月永夕猿狖啼青巒江樹葉飛

天雨霜江上吳歛思斷腸窈窕徐家兒與女却望蓬萊
如故鄉君行却向三山望雲霧軒窗六鼉上東方雖樂
不可以久畱歸獻仙公白雲唱西過錢唐過順風爲拜
湖南持斧翁會稽學士卧雲島朱絃流水鳴孤桐道我
寄語莫恩恩送君有情亦如海海水有盡別意無終窮
至日行

長安夜半通明光羣公冠佩列鴈行泰壇三成樂萬舞
布衣類得齊鳴璫小官需次祗自賤當日再拜謝日長

多少朱門圍艷質何當起視東方白

奉觀許尊府遺墨

奉常許君玉色立手抱父書紅錦襲紛茫蜀令九霄神
扶摘郢州千首涇鍾張雖云世已遠任趙未可肩相及
葉滿天地雨聲急我縱覽之重於邑却憶風雷昨夜顛
萬壑起盡蛟龍蟄不然尺素尋常耳何日

一作得

蕭蕭百

靈集草堂驚怪不敢畱至寶豈復能輕酬還君子孫世

善收扁舟歸弄江

一作五

湖秋

夜上烏巖

扁舟夜傍烏巖宿

一作樓

然火上巖尋古祠老巫輟睡啓

神戶牽幌請官窺漢儀漢家將軍利於鶻征行徃徃皆

良奇當時光武皇帝聖舉以善馭皆周知將軍再出定

窮粵忠義耿耿光精垂不然夷祀已千載何定

一作得

至

今歌舞之高縣銅鼓五獸缺以手摩拂增深悲蜈蚣宵
行蛛網結不識欸書何歲時庭中蕉葉照石面猛虎出
谷靈風吹澤魚導從吏扶掖欲畱頗復懼溪危登臨有

客動必戒況此星露景倭遲獨立蒼茫問橫浦明日江山勞夢思

古杉行

丹陵觀有古杉屹如雙闕當雲門云是鍾君之手植君去此樹餘空邨尾搖翡翠梢八表根結蛇蛟行九原幽邊豈無鬼神護溪處直形天地恩一方拆裂引穿溜猶是百年燒火痕蒼皮樹裏漸欲合始知草木有道存或云下有丹火伏四時地底皆春溫神還復壯此其驗疑

是自此無傳喧平生政坐嗜奇古來看適值寒冬昏長
歌沈思遠其下夜半月高松露繁飄飄葉縣見鳥影牢
落豐城龍劒魂何當喚起博物者共騎黃鵠凌崑崙

題皮野逸亭

方丈新亭隱叢篠下有長風蔭清沼林間白日漏遊絲
空外青煙送飛鳥人生百歲今半之更百千歲將奚爲
麻姑自是好風骨按行蓬島歸何時

張明德經歷松石圖

張君畫手天下奇，往者京城曾見之。濟南參議最博雅，
每爲送酒題長詩。溪山大澤生喬松，緘封寄我章江湄。
問君安得致此本，吏牘政類麒麟羈。又費臨川百日假，
不爾能事何能施。澗阿無人白石爛，飛泉但見下連漪。
老夫對此神慘惻，況近歲寒霜霰垂。高齋展玩意未已，
便欲共赴青雲期。搔首絃歌白駒操，悠悠四海將誰知。
懷舊游贈別杜君還益津

往與羽人曾結滄洲期，醉騎鯨魚躍天池。北走幽都摩

碣石所歷至今皆見之澤國波光秋潋灩津亭月色曉
參差山夾疎鐘和雪度樓樓斷角引霜吹蘭園坐送流
鶯亂華觀行聞住鶴悲別來幾度斜陽裏平曲風煙勞
夢思安得狂心化爲浪去隨流水到天涯偶向燕城逢
杜子爲我立馬歡相持自言家在碣石西石西易水清
淪漪易州風帆日日至佳人何事重來遲重來易遲去
易遠便欲從君川路返歲年冉冉思無限詩成鴈過雲
濤晚

小孤行

小孤有石如虎蹲西望屹作長江門洪濤萬古就繩墨
雖有勁勢不敢奔大哉禹功悉經理何必有志今能存
大者爲網小者紀不徒百谷知王尊靈祠正在石壁下
我來適值秋風昏明朝東行弔碣石更與尋河間九源
贈李山人

平生慕事華蓋君四海孤蹤隨白雲峨眉山人住盱水
駐馬重逢帝城裏別來相問意悠悠北走南飛又幾秋

昔向貴溪尋講鼓又從薊郡攬征裘展圖示我青山屋
山在盱城小江曲東風日日蕩人歸明發行歌載黃鵠
憶昔上帝勅游華子岡中道勒回俗駕賓災方是行儻
或如私願華子岡頭定相見麻姑應解索題詩碧桃花
發報人知

已未行

二年六月己未朔京城五更大地作卧者顛衣起若吹
起者環庭眩相愕室宇無波上下搖乾坤有位東西却

自我南來覩再震初震依微不今若昨朝展席坐堂上
耽玩圖書靜無覺堂下羣兒又驚報方饌饗人喪杯勺
擲者倉皇下牀榻門屋鏗鏘振鈴鐸祗今猶自騰妖訛
旦莫殊言共郭郭大家夜卧張穹廬小家露坐瞻星落
焉知怪變不可屢安巢盡有一作日南飛鵲昔聞上帝憂
瀛洲親勅巨鼇十二頭特爲羣臣舉首戴萬古不與水
東流豈其九州亦類此此事或誕或有由上帝甚神吾
甚愚戴者勿動心優游

奉酬段御史登岳陽樓之作時分理盜賊至海

康

誰能手鋪湘水平剗却君山看洞庭昔人已騎黃鶴去
樓前亂芷春蘭青豈知繡衣後千載遠違鳳闕來江城
憑高弔古落日紫領客置酒開雲屏酒酣點筆賦新句
溥海傳誦令人驚憶我初游白玉京與君聯步趨承明
手宣皇猷敷帝績濟濟學士如登瀛一行竟墮萬里外
回首滄浪思濯纓守官區區事無補惟有白髮欺人生

牂犵水外萬竹底四時鳥語煙邊鳴忽忽此地復相見
恍如幽夢求仙靈中宵秣馬不遑暇君又北鄉予南征
如茲後會復何日念之使我雙涕零宮中聖人總四溟
所過海岳須澄清鐵冠峨峨望天下青霄忤展皆修程
由來豺虎伏仁獸況有鷹隼當秋橫明夜相思隔雲島
月落高臺聞笛聲

送蕭二十兄

東郊蕭條生事微
慢馬日日趁朝歸
黑頭游宦吐梁肉

青眼高人歌薜薇
儂家旅食強甘苦
何物俗流輕是非
百歲乾坤消屐屨
三江風浪隔庭闈
桺根臘雪春猶凍
沙上晴雲煖更飛
昔擬此時具吳榜
送行何故不沾衣

奉和李監丞醉贈羽人之作

自從墮地愛名山
五岳尋真去不還
青山無津度日月
旦莫御風一作氣行其間
九江西來赴海門
中有道路古

來難笑談解入蛟蜃腹
脫此命與松喬班
吾嘗左揖三茅君
右手直接高飛翰
至今空濛偃翠蓋
望雲懷我雙

佩環君從茅山來，青衣白霓裳。肝膽出古劍，剗裁光甚

揚。玄元皇帝雲與仍。


李武昭王
嵩之孫

稱世舉德朝，未央偶吹

龍笛過九市，共君斟酌北斗傍。浪傳北斗不可挹，酌之
昨以白玉觴。百觴未已已，復醉援此織女天機章。舉頭
目送南飛鴻，我自滯畱君遠翔。眇眇美人絳珠宮，絃白
雪兮歌清風。浮萍流水相遭逢，何獨不在歧路中。何獨
不在歧路中，相思昨夜春缸紅。



元詩選初集卷二十八



總校官候補中書臣 吳紹濬
校對官編修臣 馬啟泰
謄錄監生臣 姜也魯